

Date – 30/08/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Indian Football Awards 2026 nizana semchhuah ah 'Indian Footballer of the Year 2026' atan Lallianzuala Chhangte thlan a ni.
2. Home Minister Pu K. Sapdanga'n kumin August ni 20 thlenga Mizorama raltlan lo lut chhinchhiah 38,213 an awm a ti.
3. Sports Minister Pu Lalnghinglova Hmar chuan Vision Olympic 2036 thlir chungin Mizoram hmun hrang hrangah thalai sang chuang training tir an ni a ti.
4. Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram chhung leh ram pawn mipuite hnenah thuchah a sawi dawn.

<><><>

LALLIANZUALA CHHANGTE

Indian Football Awards 2026 nizana semchhuah ah 'Indian Footballer of the Year 2026' atan Lallianzuala Chhangte thlan a ni.

Football Players Association of India (FPAI) huaihawt Indian Football Awards 2026 hi India rama Football-a chawimawina sang ber te zinga ngaih theih, an players puite vote atanga thlan thin chawimawina a ni a, Lallianzuala Chhangte hian kum 2023-2024 season khan a lo dawng tawh a ni.

Kum 29 mi Lallianzuala Chhangte hian tunhnai khan a khelh thinna Mumbai FC chhuahsanin Mohun Bagan a zawm a, nizan khan India Football thiam hmingthang Bhaichung Bhutia hnen atangin 'Indian Footballer of the Year 2026' chawimawina hi a dawng a ni.

Chief Minister Pu Lalduhoma chuan Lallianzuala Chhangte a lawmpui thu social media kaltlangin a sawi a, Mizoram Football Association pawhin Mizo tlangval hnena chawimawina hlan ani chu lawmawm antih thu sawiin kum 2015 – 2016 khan Jeje Lalpekhlua pawhin a lo dawng tawh an ti a, Mizo infiammi lo awm zel tur tana entawntlak an nei chu lawmawm an tih thu an sawi a ni.

<><><>

ART & CULTURE MINISTER : LIVING MUSEUM

Art & Culture Minister Pu C. Lalsawivunga'n Falkawna Living Museum chu tun aia changtlung zawka kalpui chhonzawm zel tum a ni a ti.

Mizoram Legislative Assembly fur thutkhawma ziaka zawhna a chhanah Pu C. Lalsawivunga chuan Art & Culture Department buatsaih Living Museum ah khualzin leh tualchhung mi tlawh an tam thin hle a ti a, kumin January thla tir atanga

chhinchhiah danin khualzin 3029 leh tualchhung mi 4985 ten an tlawh tiin kuminah tlawhtu a vaiin mi 8014 an awm a ti.

Live Museum Show hi kartin Inrinni apianga neih thin niin Thangthar leh naupang zawkte’n Mizo nunze mawi leh chin dan hrang hrangte a tak ngeia an hmuh leh tem chhin theih nan te, zirlai naupangte tana tangkai tur leh an zirlaibua awmte an hriatthiam lehzual theih nan leh khualzinte’n Mizo hnam nun an hmuhfiah theihna tura buatsaih a ni a, cheng 100 chawiin inrinni ah chhim theih a ni.

<><><>

HOME MINISTER : REFUGEE

Home Minister Pu K. Sapdanga’n kumin August ni 20 thlenga Mizorama raltlan lo lut chhinchhiah 38,213 an awm a ti.

Assembly thutkhawm zawh taka zawhna ziaka a chhanna ah Pu K. Sapdanga chuan Mizorama raltlan lo lut chhinchhiah zingah Myanmar mi 29575 awmin Manipur atanga lo lut chhinchhiah 6959 an awm a ti a, Bangladesh atanga lo lut 1679 nen a vaiin raltlan 38,213 chhinchhiah an ni a ti.

Minister chuan Mizorama Myanmar raltlante biometric enrolment-a chhinchhiah hna chu 98.90% zawhfel tawh a ni ati a, Mizorama Bangladesh raltlan biometric enrolment-a chhinchhiah hna chu 100% zawhfel niin Mizorama raltlan lo lut te chu State Sawrkar in District tina DC te kaltlangin chhawmdawl hna a thawk mek zela, an awmna tur relief camp siamsak niin an eitur buhfai leh mamawh dang pawh pek thin an ni a ti bawk.

Pu K. Sapdanga chuan Raltlante enkawlna atana Sorkar-in Rs 2,85,39,611/- (Vaibelchhe hnih nuai sawmriat panga singthum sangkua zaruk sawm pakhat) a seng tawh a ti a, Raltlan (Refugee) chungchangah Ministry of Home Affairs atangin tun hnaiah thuchhuah thar dawn a awm lo ati bawk.

<><><>

EXCISE MINISTER : DRUGS SEIZURE

Excise Minister Pu Lalnghinglova Hmar chuan kum 2024 atanga ruihhlo man hlut zawng chu cheng vbch 203 nuai 65,84,400/- a ni a ti.

Assembly thutkhawm zawh taka zawhna ziaka a chhanna ah Pu Lalnghinglova Hmar chuan Mizoramah kum 2024 atanga ruihhlo man zat chu a vaiin cheng vbch 203 nuai 65,84,400/- a ni a ti a, ruihhlo hi chi hrang hrang niin Myanmar ramri atangin leh thenawm state Assam, Manipur leh Tripura atanga man a ni a ti bawk.

Excise and Narcotics Department thuchhuah tarlan danin kumin chhungin rakzu litre 48,036 an man tawh a, zu bilh lai tin 1,07,596 bakah sap zu thahnem tak an man bawk a, Heroin kg 17 gram 280 leh Ganja 145 leh gram 499 bakah damdawi thahnem tak an man bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

SPORTS MINISTER : VISION OLYMPIC

Sports Minister Pu Lalnghinglova Hmar chuan Vision Olympic 2036 thlir chungin Mizoram hmun hrang hrangah thalai sang chuang training tir an ni a ti.

Mizoram Legislative Assembly fur thutkhawma ziaka zawhna a chhanah Pu Lalnghinglova Hmar chuan Olympic 2036 thlir chungin kum 2024 June 13-14 ah Mizoram Sports Conclave hlawhtling takin huaihawt a ni a ti a, Grassroots Sports Development Programme hlawhtling takin kalpui niin kum 2025 September ni 1 atanga February 26 thleng Mizoram hmun hrang hranga training centre 46 ah zirlai naupang kum 6-14 inkar mi 1380 lai training pek an ni a ti bawk.

Minister chuan Olympic 2036 tinzawnin Empowering Mizoram Sports (EMS) chu a taka kalpui tan niin sports discipline pariat, Mizoten theihna sang tak an neihna leh rampum huapa an that na - Archery, Badminton, Boxing, Hockey, Judo, Taekwondo, Weightlifting, Wrestling – ah hmalak ani tiin khaw 53 ah hlawhtling taka training kalpui ani a ti a, Naupang kum 8 – 15 mi 1219 te training pek an ni tawh a, an zinga 36% hi hmeichhe naupang an ni a ti bawk.

Minister chuan Ram chhung leh pawna sports zirna hmun tha zawk te leh Sorkar dangte nena thawh ho dan tur ngaihtuah mek zel a ni a ti a. Central Sorkar thlengin Vision Olympic 2036 thlir reng chungin Sorkar hmalakna leh thawh dun dan tur te pawh sawi ho a ni tawh a ti bawk.

<><><>

PM MANN KI BAAT

Prime Minister Narendra Modi chuan vawiin chawhna dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 137-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>

NEPAL

Nepal tuilian avanga thi zat chu 669 an tling tawh a. Mi 2000 chuang chin hriatlohin an la bo. Chhanchhuah hna ngawrh taka thawh mek a ni a. Harsatna tawh district hrang hrangah zawn leh chhanchhuah hna thawh mek zel a ni a. Official-te leh police-te chuan mipuite leh pawl hrang hrang te nen inremna siamin, mi bo zawng chhuakin, tuilian vanga tangkhangte chu an puih thu an sawi.

Hetihlai hian External Affairs Ministry chuan India mi 80 chu chhanchhuah tawh niin, mi 287 chu biak pawh theihlohin an la awm tih a puang a ni.